

Bandinga ya Yesu na Zulu ya Kulunsi

Leso 1 ya ndaa to 2-7 kuluta nkufi

Tala Banote ya Kutendula sambu na Longi sambu na kuzaba inki mutindu kukabisa baleso.

Baverse ya Bible sambu na leso yai: (Sambu na kusadisa na preparatio ya baleso yonso) Yesaya ch 53 vs 7; Matayo ch 27 vs 36-54; Marko ch 15 vs 24-39; Luka ch 23 vs 32-48; Yoane ch 19 vs 17-37.

NB Kutendula sambu na Longi:

Longi, yindula mambu yai na ntwala ya kuyidika leso (baleso) yai: Leso yai kele kulonga bandinga ya Yesu tubaka na zulu ya kulunsi. Yo ta lomba heure ya mvimba kulonga leso yai, ti kuyimba to ba-activités ya nkaka, yo kele na zulu ya heure yina. Kana ntangu ke lunga ve kulonga ndambu yai mbala mosi, kabisa yo na bandambu ya kulunga ntangu nge kele na yo. Leso yai kele na bandambu nsambwadi. Kana ntangu ya kulonga kele nkufi, nge mpi lenda sadila konso ndambu bonso leso mosi. Mpidina yo ta basika baleso nsambwadi, to nge lenda longa bandambu zole to tatu konso mposo. Mpidina yo ta basika baleso 2 to 3 ya kuluta nkufi.

Baverse ya kulonguka sambu na baleso yai yonso:

Roma ch 5 vs. 8 ti 9

Na leso to baleso ya ndambu ya ntete, longa vs. 8: *“Kansi Nzambi songaka beto mutindu yandi ke zolaka beto: Kristo fwaka sambu na beto ntangu beto vandaka kaka bantu ya masumu.”*

Na leso to baleso ya ndambu ya zole, bana tuba diaka vs. 8 ti nge yika vs. 9 *“ Ntangu yai, sambu na menga ya Kristo, Nzambi me ndima beto; mpidina Kristo ta gulusa beto mpenza na ndola yina ya Nzambi ta pesa beto na makasi na yandi.”*

(Ntangu nge longa vs. 9, bana yantika na vs. 8, ebuna nge yika vs. 9. Na nsuka bo ta vanda na mpila kutuba baverse yonso zole mbala mosi.)

NB: Kana lukanu na nge ikele kusadila konso kitini bonso leso mosi, kana bana me longuka vs. 8 ti 9 imene, nge lenda yika mpi vs. 10: *“Beto vandaka ntete bambeni ya Nzambi, kansi beto me wakana ti yandi sambu na lufwa ya Mwana na yandi. Ebuna, kana beto me wakana ti Nzambi ntangu yai, moyo ya Mwana na yandi ta gulusa beto mpenza.”*

Leso 1—Bandinga ya Yesu Tubaka bu Yandi Vandaka na Zulu ya Kulunsi

Kikuma ya Leso to Baleso: Na nsuka ya leso yai, bana ya classe ta bakisa nde bandinga ya Yesu tubaka ntangu Yandi vandaka na zulu ya kulunsi, yo songaka luzolo na Yandi sambu na beto bantu ya mbi. Yo yina, bo ya me tula ntima na Yandi ntete ve, bo ta mona mfunu kundima Yandi; ti bo ya zaba Yandi dezia, bo ta mona mfunu kusonga Nsangu ya Mbote na bantu ya nkaka.

Bangindu ya nene na lesu yai:

1. Yesu pesaka mvutu ve ntangu bantu saulaka Yandi, ata bantu mingi sekaka Yandi. Yandi vandaka kaka pima.

1A Tanga:

<p><i>Matayo ch 27 vs 36, 39 tii na 44</i></p> <p><i>36 Ebuna bo vandaka, bo yantikaka kukengila yandi.</i></p> <p><i>39 Bantu vandaka kuluta pana, bo vandaka kunikisa ntu na bo ti kusaula yandi</i></p> <p><i>40 nde: "Si nge muntu vandaka kutuba nde nge ta fwa Nzo-Nzambi ebuna nge ta tunga yo diaka na bilumbu tatu! Gulusa moyo na nge kana nge kele Mwana-Nambi! Katuka na kulunsi, kwisa kutuluka!"</i></p> <p><i>41 Bambuta ya banganga-Nzambi, balongi ya Bansiku ti bambuta ya nkaka, bo vandaka kuseka yandi mpi nde:</i></p> <p><i>42 "Yandi vandaka kugulusa bantu ya nkaka, kansi yandi lenda kudigulusa ve! Keti yandi kele ntotila ya Israele? Yandi katuka sesepiyai na zulu ya kulunsi, mpidina beto ta ndima yandi.</i></p> <p><i>43 Yandi tulaka ntima na Nzambi, yandi tubaka mpi nde yandi kele Mwana-Nzambi. Ebuna, Nzambi kugulusa yandi ntangu yai kana yandi ke zolaka yandi!"</i></p> <p><i>44 Ata babandi yina ya bo tulaka na zulu ya bakulunsi penepene na Yesu, bo mpi vandaka kusaula yandi kiteso mosi.</i></p>	<p><i>Yesaya 53:7</i></p> <p><i>7 Bo vandaka kumonisa yandi mpasi mingi, kansi yandi ndimaka yo kaka, yandi vandaka kutuba kima ve. Yandi vandaka bonso mwana-dimeme ya bo ke kwenda kufwa, bonso dimeme yina ke dila ve ntangu bo ke zenga yo mika; yandi vandaka kutuba kima ve.</i></p>
--	--

1B Yula bana bonso yai--

Niveau Primaire:

Longi, NB : Yula bana, ebuna kinga sambu bo pesa mvutu. Mvutu ya mbote kele na kati ya parathese mutindu yai : ().

- Nani ke zola muntu kuseka yandi? (Muntu ve.)
- Kana muntu kuseka nge, nge mona yo inki mutindu na nsi ya ntima? (Bana pesa mabanza na bo.)
- Nani sekaka Yesu na baverse yai ya beto me tanga? (Bo ya vandaka kutala ti kuluta, basoda, bamfumu ya banganga-Nzambi, bambuta ya bantu, banlongi ya Bansiku, ata babandi ya vandaka kufwa na bakulunsi ya nkaka—yonso vandaka kuseka Yandi mpi kusaula Yandi.
- Inki mambu ya mbi Yesu salaka na bantu yai nde bo fweti kuseka Yandi? (Yandi me sala bo mbi ve ata fioti. Yesu salaka mambu ya mbote na bantu mingi, kansi Yandi salaka mbi na ata muntu mosi ve.)

- Inki bo tubaka na Yandi sambu na kusaula Yandi? (Bima mingi, bonso, nge gulusaka bantu ya nkaka, kansi nge lenda kudigulusa ve.)
- Mbikudi Yesaya sonikaka mbikidulu na yandi bankama ya bamvula bankama sambanu na ntwala Yesu kwisaka, ti yo songaka inki mutindu Yesu Mesia ta fwa. Yesaya tubaka nde inki ta vanda mvutu ya Mesia ta pesa na bo ya vandaka kupesa Yandi mpasi? (Yandi ta mona mpasi, kansi Yandi ta vutula ata ndinga mosi ve.)
- Keti beto fweti pesa mvutu na konso muntu ya zola seka beto? (Beto fweti sala yo ve, sambu Yesu salaka yo ve.)

Niveau Secondaire:

- Sambu na inki nge banza Yesu pesaka mvutu ve ntangu bantu sekaka Yandi? (Longi, bana lenda pesa mabanza na bo. Mvutu mosi lenda vanda nde mbikidulu tubaka nde Yandi ta vutula ndinga ve, mvutu ya nkaka lenda vanda nde Yandi bakisaka nde Yandi fweti kufwa sambu na masumu na beto, ti Yandi bakisaka nde ata muntu mosi ve lenda kanga lukanu ya Nzambi, kansi yo fweti salama kaka.)
- Ntangu Yesu vutulaka ndinga ve, keti yai songaka nde Yandi vandaka ngolo to ngolo ve? (Ngolo. Konso muntu lenda wa makasi ti vutula bandinga ya kiteso mosi. Kaka muntu ya ngolo lenda kanga ntima ti kanga munoko na ntangu bonso yo.)
- Kana muntu seka beto, yo benda makasi na nsi ya ntima. Sambu na inki nge banza Yesu waka makasi ve? (Yandi bakisaka nde yonso vandaka lukanu ya Nzambi.)
- Kana muntu seka beto, mbala mingi beto zola kaka kupesa mpasi na muntu ya pesaka beto mpasi. Bantu yai vandaka kupesa Yesu mpasi ya ngolo. Ebuna, sambu na inki nge banza Yesu zolaka ve kuvutula bo mpasi? (Ntima na Yandi vandaka mpidina ve. Yandi zolaka beto bantu.)
- Mbala na mbala bantu tuba nde Bayuda (Bazwif) kele mbi sambu bo bantu fwaka Yesu. Yo kele kieleka nde bamfumu ya banganga-Nzambi ya Bayuda ti bambuta na bo, bo vandaka kuseka Yesu. Keti yo kele kieleka nde Bayuda bantu fwaka Yesu?

(Bo vandaka na kati ya bantu ya fwaka Yesu, kansi bamfumu ya Roma pesaka ordre nde bo kufwa Yandi, ti basoda ya Roma salaka yo. Bo yonso vandaka kuseka ti kusaula Yandi. Kansi muntu kufwaka Yesu ve. Yesu kudipesaka moyo na Yandi sambu beto yonso lenda mona ndolula ya masumu na beto, sambu beto yonso lenda vutuka na kintwadi ti Nzambi. Na mpila mosi, beto lenda tuba nde masumu na beto kufwaka Yesu.)

- Ntangu Yesu vutulaka ve ndinga na bantu ya sekaka Yandi, inki mutindu mambu yai lungisaka mbikudulu ya Kuwakana ya Ntama? (Mbikudu Yesaya sonikaka bonso bamvula nkama sambanu na ntwala ya Yesu, ti yandi tubaka nde bantu ta pesa Mesia mpasi, kansi Mesia, yandi ta kangula ve munoko na Yandi. Yo

salamaka kaka na mutindu Nzambi songaka Yesaya.)

1C Kusonga inki me salama:

Sola mwana mosi kusala bonso Yandi keke Yesu. Yesu telema kaka, ti Yandi keke kaka pima. Nge sala bonso bantu ya keke kuseka Yandi. Nge tuba mambu ya mbi sambu na Yandi, ti nge sala bageste ya mbi ti sala baluse ya mbi na Yandi. Yandi vutula kima ve, kansi Yandi keke kaka pima.

1D Kuyimba ti kukina inki me salama (ti bageste):

Yesu vandaka pima
Yandi vutulaka ve
Ata bantu tubaka
mambu ya mbi mingi.

Yesu zabaka mbote
Yandi vandaka nani,
Yandi zabaka kimalu ya Yandi
'Buna Yandi vandaka pima.

2. Yesu lolulaka bantu ya vandaka kupesa Yandi mpasi ti bo ya vandaka kufwa Yandi.

2A Tanga:

Luka ch 23 vs. 33 Ntangu bo kumaka na kisika yai ya bo ke bingaka nde: “Mukwa ya Ntu”, bo tulaka Yesu na zulu ya kulunsi sambu yandi fwa. Bantu yina salaka mambu ya mbi, bo tulaka bo mpi na zulu ya bakulunsi, bo tulaka bo muntu mosi na ndambu ya diboko ya Yesu ya kibakala, muntu mosi na ndambu ya diboko na yandi ya kinkento.

2B. Yula bana bonso yai--

Niveau Primaire:

- Na inki kisika bo fwaka Yesu na zulu ya kulunsi? (Na kisika ya bo vandaka kubinga “Mukwa ya Muntu”.)
- Nani kufwaka na bakulunsi ya nkaka nzila mosi ti Yesu? (Bantu zole ya me sala mbi—mosi na diboko na Yandi ya kibakala ti mosi na diboko na Yandi ya kinkento. Bisika ya nkaka na Bible ke tuba nde bo vandaka babandi.)
- Na kisambu ya Yesu na zulu ya kulunsi, Yandi lombaka Nzambi inki? (Yandi lombaka Nzambi kulolula bantu ya vandaka kufwa Yandi.)
- Sambu na inki Yandi lombaka ndolula sambu na bantu yina? (Yandi tubaka nde bo vandaka ve kubakisa inki bo vandaka kusala.)

Niveau Secondaire:

- Lombilu ya Yesu na zulu ya kulunsi—keti yo kele bonso lombilu nge banza muntu ta samba na ntangu yina? (Mbala ya nkaka beto banza nde muntu ya ke mona mpasi ya mutindu yina, yandi ta vanda na makasi ti yandi ta lombaka Nzambi kusinga bo ya pesaka mpasi yina. Kansi Yesu salaka mpidina ve.)
- Bantu ya tulaka Yesu na zulu ya kulunsi zabaka mbote nde bo vandaka kufwa Yandi. Ebuna, inki kele nsongidila ya bandinga ya Yesu ntangu Yandi tubaka nde, “bo zaba ve inki bo kele kusala?” (Bo bakisaka ve nde Yandi vandaka kieleka Mwana ya Nzambi, ti bo bakisaka mpi ve nde Yandi vandaka kufwa bonso nkailu sambu na masumu na bo.)
- Kulolula muntu ya ke pesa nge mpasi--yo ke lombaka ngolo ya inki mutindu? (Ngolo mingi)
- Yesu vandaka na nzila ya kufwa ntangu Yandi tubaka bandinga yina, kansi yo ke monika bonso Yandi ke tula ntima kaka na lukanu ya Nzambi. Inki mutindu? (Longi, kuwa mabanza ya bana. Yesu zabaka nde Yandi vandaka nani, mpi Yandi zabaka nde lufwa ta manisa Yandi ve, sambu Yandi ta telema na lufwa.)

2C Kusonga inki salamaka:

Sola bana tanu. Mosi ta vanda bonso Yesu, zole ta vanda bonso bantu ya mbi ya fwaka nzila mosi ti Yesu. Bo bana tatu ta telema, maboko ya mpila ya ke songa nde bo kele na zulu ya bakulunsi. Bo yonso tatu songa nde bo ke mona mpasi mingi. Bana zole ya nkaka kele basoda ya Roma. Bo sala bonso bo ke tula banonso na maboko ti na makulu ya Yesu. Yesu dila na mpasi, ebuna na nima Yandi samba nde, "Tata na zulu, lolula bo, sambu bo zaba ve inki bo kele kusala."

2D Kuyimba ti kukina sambu na kusonga inki me salama:

Yesu nde,
Tata, lolula bo
Sambu bo kuzaba ve
Inki bo kele kusala.
Tata, lolula bo.
Tata, lolula bo. (yimba diaka.)

3. Yesu lombaka Yoane kusadisa mama na Yandi, Maria.

3A. Tanga:

Yoane ch. 19 vs. 25 tii na 27

25 Bankento iya vandaka me telama penepene na kulunsi ya Yesu, bo yai: mama ya Yesu, ti mpangi na yandi ya nkento, ti Maria nkento ya Klopasi, ti Maria ya bwala Magdala.

26 Yesu monaka mama na yandi ti mulonguki yina ya yandi vandaka kuzola, bo me telama penepene na mama na yandi Yesu. Yandi tubilaka mama na yandi nde: "Mama yai, tala mwana na nge."

27 Ebuna Yesu tubilaka mulonguki yina nde: "Tala mama na nge." Katuka ntangu yina, mama ya Yesu vandaka kuzinga na nzo ya mulonguki yina."

3B. Yula bana bonso yai--

Niveau Primaire:

- Nani vandaka kutelama penepene na kulunsi sambu na kutala Yesu? (Bamaria tatu—Maria mama ya Yesu; Maria mpangi na yandi nkento ya Klopasi; ti Maria ya bwala Magdala.)
- Mulandi ya Yesu, mosi ya balonguki 12, vandaka kuna mpi. Beto kwikila yo vandaka Yoane. Inki Yesu songaka Maria sambu na Yoane, ti inki Yandi songaka Yoane sambu na Maria mama na Yandi? (Yandi Yoane ta vanda bonso mwana ya Maria, ti Maria ta kuma bonso mama na yandi.)
- Yai zola kutuba inki? (Yesu zolaka nde Yoane sadisa ti sansa Maria mama na yandi, bonso yandi zolaka kusala kana Maria vandaka bonso mama na yandi kibeni.)

Niveau Secondaire:

- Yesu vandaka kuyindula nani ntangu Yandi tubaka bandinga yai? (Mambote ya mama na yandi, Maria.)
- Sambu na inki Yesu ta yindula nde muntu fweti sadisa Maria? (Na culture na bo, yo vandaka mbuta ya bakala ya vandaka kusadisa mama. Yo ke monika nde Yosefi, bakala na yandi, me fwa na ntwala ya ntangu yai. Bible ke tanga zina na yandi diaka ve na nima mambu ya salamaka na Temple ntangu Yesu vandaka bamvula 12.)
- Na ntangu ya nge ke mona mpasi, keti nge yindula kaka makambu ya nge mosi, to nge yindula mpi makambu ya bantu ya nkaka? (Bana yindula ti bo pesa mvutu.)

3C. Kusonga inki me salama:

Kabisa bana na bandambu, konso ndambu na bana tanu. Ndambu mosi lenda vanda na bana kuluta tanu kana mfunu ikele. Na konso ndambu, bana lenda sola mwana mosi kusala bonso Yesu. Mosi ta vanda Maria, mama ya Yesu; mosi ta vanda Maria mpangi na yandi; mosi ta vanda Maria ya bwala Magdala; ti mosi ta vanda Yoane. Kana ndambu bana me bikala, bo lenda vanda bantu ya nkaka ya vandaka kutala Yesu na zulu ya kulunsi. Yesu telama, maboko na yandi bonso Yandi kele na zulu ya

kulunsi. Bo yonso ya nkaka tala Yandi, ti bo dila. Yesu tala Maria mama na Yandi, ti tubila yandi nde: “Mama, tala mwana na nge.” Na nima Yandi tubila Yoane nde: “Yoane, tala mama na nge.” Maria tala Yoane ti yandi tala Maria, ti bo yonso nikisa ntu ti tuba nde, “Ee.”

3D Kuyimba ti kukina:

Yoane, sadisa Maria,
Yandi mama ya nge.
Yoane, sadila yandi mbote
Yandi mama ya nge.

4. Kiteso ya 15 h, Yesu lombaka Nzambi sambu na inki Yandi Nzambi me vila Yandi.

4A Tanga :

Matayo Ch 27 vs 46, 47, ti 49

46 Na batrwazere (15h) Yesu tubaka na ndinga ya ngolo nde: "Eli, Eli, lema sabakatani?" disongidila nde: "Nzambi na mono, Nzambi na mono, sambu na nki nge me bikisa mono?" 47 Bantu ya nkaka vandaka pana, ntangu bo waka mambu yina, bo tubaka nde: "Muntu yai ke binga Elia!" 49 Kansi bantu ya nkaka nde: "Beto tala kana Elia ta kwisa kugulusa yandi!"

4B Yula bana bonso yai—

Niveau Primaire:

- Mambu yai lutaka na inki ntangu na lumbu yina? (Batwazere na nkokila to 15 h)
- Yesu sadilaka ndinga ya inki mutindu? (Ndinga ya ngolo)
- Yesu tubaka bandinga yai na ndinga "Aramaiki", ya vandaka bonso ndinga ya bwala ya Bazwif ntangu yina. Bandinga yina tubaka inki na Kikongo? "Nzambi na mono, Nzambi na mono, sambu na nki nge me bikisa mono?"
- Keti nge me wa na nsi ya ntima bonso Nzambi me bikisa nge? (Longi, kana mwana ndima nde ee, pesa bo nzila kutuba sambu na inki bo me wa mutindu yina. Songa bana nde ata beto me wa na nsi ya ntima bonso Nzambi me bikisa beto na ntangu ya mpasi, Yandi kele konso ntangu ti beto kaka.)
- Nzambi me bikisa Yesu kibeni ve, sambu lufwa ya Yesu na zulu ya kulunsi vandaka na kati ya lukanu na Yandi sambu na kugulusa beto. Kansi, beto lenda tuba nde Tata Nzambi pesaka Yesu mukongo kaka ntangu fioti bu Yandi vandaka na zulu ya kulunsi. Kansi yo vandaka lukanu na Yandi katuka na luyantiku nde yo salama mpidina, ebuna Tata pesa Yesu luse diaka. Sambu na inki nge banza yo vanda mfunu nde Nzambi sala mpidina?
(Ntangu Yesu vandaka na zulu ya kulunsi, Yandi vandaka kubaka kilo ya masumu ya beto yonso. Bonso Nzambi kele ya longo kaka, Yandi lendaka ve kutala masumu yina na kiesa. Kansi Yandi vandaka na lukanu nde na nsuka, Yandi ta ndima nkailu ya Yesu pesaka ti Yandi ta ndima Yesu mpenza.)
- Bantu ya vandaka kutala, bo waka Yesu mbote mingi ve. Bo waka ndinga ya bwala, "Eloi," ebuna bo banzaka nde Yesu vandaka kubinga muntu mosi. Bo banzaka nde Yandi vandaka kubinga nani? (Elia, mbukidi ya Nzambi ya ntama.)
- Bantu ya nkaka tubaka inki? (Bo tubaka nde, "Beto tala kana Elia ta kwisa kugulusa yandi!")

Niveau Secondaire:

- Bantu ya nkaka ya me longuka Bible, bo tuba nde mpasi ya ntima ya Yesu waka, ntangu Yandi waka na ntima bonso Nzambi me bikisa Yandi, yo vandaka ngolo. Mbala ya nkaka yo lutaka mpasi ya Yandi waka na nitu ntangu bo bulaka maboko na Yandi banonso. Sambu na inki nge banza nde mambu yina pesaka Yesu mpasi mingi mutindu yina?
(Yesu me zinga mvu ya mvu na kintwadi ya kitoko ti Tata na Yandi. Yo monikaka ntangu yina bonso kintwadi yina me fwa.)
- Ntangu bantu tubaka nde, “Beto tala kana Elia ta kwisa kukatula yandi na kulunsi!” nge banza bo vandaka kuyindula inki? (Bo vandaka kuseka Yandi kaka. Bo zabaka nde muntu ta kwisa ve kukatula Yandi. Kansi bo bakisaka ve nde yina vandaka yonso na lukanu ya Nzambi.)
- Tala *Matayo ch 26 vs 53 ti 54*. Yesu tubaka bandinga yai ntangu Yandi vandaka na Kilanga ya Getesemani ti balonguki na Yandi, ntangu bantu kwisaka kukanga Yandi. Yandi nde, *“Nge zaba ve nde kana mono zola, mono lenda lumba lusadisu na Tata na mono, ebuna yandi tindila mono nswalu ndonga kumi na zole ya bawanzio? 54 Kansi kana mono sala mpidina, nki mutindu mambu yina ya bo sonikaka na Mukanda ya Nzambi lenda kwisa kulunga? Sambu yo ke tuba nde yo fweti vanda mutindu yina.”* Bandinga yai ya Yesu songa beto inki raison ya Yandi kulumukaka ve na kulunsi?

(Nzambi vandaka na ngolo kukatula Yandi, kansi yo vandaka lukanu na Yandi ve. Lukanu na Yandi vandaka nde Yesu kufwa sambu beto lenda guluka, mpila Nzambi me songa na bamikidulu ya ntama nde yo ta salama.)

4B Kusonga inki me salama:

Bana yonso na kimvuka sala bageste ya ke songa Yesu, ntangu Yandi ke tuba nde, “Nzambi na mono, Nzambi na mono, sambu na nki nge me bikisa mono?”

4C Kuyimba ti kukina:

(Na mawa, bonso na mafwa)

Mm Mmm

Mawa! Mawa!

Tata lenda tala ve

Mbi na beto na zulu ya Yesu.

Mawa! Mawa!

5. Bandi mosi ndimaka Yesu, ebuna Yesu silaka nde Yandi ta vanda ti Yandi na Paladiso.

5A Tanga:

Luka ch 23 vs 39 tii na 43

39 Muntu mosi na kati ya bantu yina vandaka na zulu ya bakulunsi, bayina salaka mambu ya mbi, yandi vandaka kusaula Yesu nde: “Keti nge kele Mesia ve? Nge kudigulusa nge mosi, ebuna gulusa beto mpi.”

40 Kansi muntu yina ya nkaka nganinaka yandi nde: “Nge ke tina Nzambi boma ve? Si nge mpi me baka ndola mosi ti yandi!”

41 Sambu na beto, ndola yai ya beto me baka yo kele ya kieleka, sambu beto me zwa mambu yina ya beto vandaka kusosa. Kansi muntu yai salaka ata mambu mosi ya mbi ve.”

42 Ntangu yai, yandi tubilaka Yesu nde: “Yesu, yindula mono ntangu nge ta kwisa kuvutuka sambu na kuvanda ntotila.”

43 Ebuna Yesu nde: “Mono ke tubila nge mambu ya kieleka: yantika bubu yai, nge ta vandaka ti mono na Paladiso.

5B Yula bana bonso yai--

Niveau Primaire:

- Nani bantu zole ya vandaka kutuba na Yesu? (Babandi zole ya vandaka na bakulunsi ya lweka na Yandi.)
- Yesu tubaka inki na bandi ya vandaka kusaula Yandi? (Yandi tubaka kima ve.)
- Inki vandaka masolula na kati ya babandi yina zole? (Bandi mosi ndimaka nde bo vandaka kubaka ndola ya lungaka na bo, kansi yandi bakisaka nde Yesu me sala mambu ve ya mbi.)
- Yandi lombaka inki na Yesu? (Kubambuka yandi nde Yesu kuma ntotila.)
- Yesu vandaka na nzila ya kufwa ya zulu ya kulunsi, kansi bandi yina tuba bonso ata mpila yina, Yesu ta kuma ntotila kaka. Yai lenda salama inki mutindu? (Yo fweti vanda nde Yesu ta telema na lufwa to nde Yandi ta kwisa diaka. Mbala ya nkaka yandi me wa malongi ya Yesu ti yandi zabaka nde Yesu me sila mambu yina yonso zole.)
- Yai ke songa inki sambu na lukwikilu na yandi? (Yandi kwikilaka Yesu ti ndinga na Yandi.)
- Inki Yesu silaka yandi? (Bubu yai, nge ta vandaka ti mono na Paladiso.)
- Inki mambu ya mbote muntu yai salaka nde yandi fweti guluka? (Kima ve. Kaka yandi ndimaka masumu na yandi ti kwilaka na Yesu Kristo.)

Niveau Secondaire:

- Keti muntu lenda guluka na nsuka ya moyo na yandi, ata yandi lenda sala kima ve sambu na Yesu? (Ee, Yesu ndimaka muntu yai na nsuka ya moyo na yandi.)
- Keti Yesu songaka muntu yina nde yandi fweti baka mbotika, ebuna yandi ta guluka? (Ikele ve. Yo kele mbotika ve ya ke gulusa muntu. Muntu yai ndimaka masumu na yandi, yandi kwikilaka, yandi bingaka zina ya Yesu kaka. Yesu tubaka nde yandi me guluka.)

5C Kusonga inki me salama:

Mwana mosi sala bonso yandi kele Yesu. Kabisa bana ya nkaka na bandambu zole. Ndambu mosi vanda bandi ya vandaka kusaula Yesu, ti ndambu ya nkaka vanda muntu ya ndimaka Yandi. Bo songa inki me salama na histoire.

5D Kuyimba ti kukina:

Bambuka mono, Yesu
 Mono muntu ya mbi
 Ntangu nge ta kuma
 Ntotila!

Mpangi, kieleka
 Kaka bubuyai
 Nge ta vanda ti Mono
 Na Paladiso.

6. Yesu tubaka nde Yandi vandaka na nzala ya masa.

6A Tanga:

<p><i>Matayo Ch 27 vs. 48</i> <i>Nswalu, muntu mosi na kati na bo kwendaka ntinu sambu na kubaka kinuka, yandi tula yo na vinu ya ndudi, yandi kangisa yo na nti ya nda, ebuna yandi meka kutula Yesu na munoko sambu yandi nwa.</i></p>	<p><i>Marko Ch 15 vs. 36a</i> <i>Muntu mosi kwendaka ntinu sambu na kufulusa kinuka ya vinu ya ndudi. Yandi tulaka yo na nti ya nda, ebuna yandi mekaka tulula Yesu yo na munoko sambu yandi nwa.</i></p>	<p><i>Yoane Ch 19 vs. 28-29</i> 28 Na nima ya mambu yina yonso, Yesu zabaka nde ntangu yai yandi me manisa bisalu na yandi yonso. Ebuna, sambu mambu yina ya bo sonikaka na Mukanda ya Nzambi kulunga, yandi tubaka nde: “Mono ke na nzala ya masa.” <i>29 Kuna vandaka na dibungu mosi me fulukaka na vinu ya ngani. Ebuna basoda tulaka kinuka mosi na kanti ya vinu yina, bo kanga yo na lutangu ya mwa-nti ya izope; bo lutisa yo tii na munoko ya Yesu.</i></p>
---	--	---

6B Yula bana bonso yai—

Niveau Primaire:

- Bu Yesu zabaka nde ntangu ya lufwa na Yandi vandaka penepene, Yandi tubaka inki? (Mono kele na nzala ya masa.)
- Sambu na inki Yandi tubaka mpidina? (Sambu na kulungisa mambu ya bamikudi ya Nzambi me songa na ntwala sambu na Yandi Mesia. Na Nkunga 69, nzila ya kutanga 22b, yo songaka nde bo ta pesa Mesia vinu ya ndudi bonso vinegre na kunwa.)
- Bo pesaka Yandi inki ya kunwa? (Vinu ya ndudi)
- Bonso bo me kanga maboko na Yandi na kulunsi na bansonso, inki mutindu Yandi lenda nwa? (Bo tulaka kinuka ya vinu ti kangaka yo na nti sambu yo kuma na munoko na Yandi.)

Niveau Secondaire:

- Keti Yesu lombaka masa sambu Yandi vandaka kuyindula mambote na Yandi mosi? (Ikele ve. Yandi tubaka yo sambu na kulungisa Ndinga ya Nzambi.)
- “Ntangu mono vandaka nzala ya masa, bo pesaka mono vinu ya ndudi.” Mbikidulu ya Yesu lungisaka kele na Nkunga 69 nzila ya kutanga 22b. Vinu ya ndudi vandaka bonso vinegre. Sambu na inki bo ta vanda na kibungu ya vinu mutindu yina na sika ya bo ke fwaka bantu? (Bo sadilaka yo sambu na

kukatula ndambu mpasi ya bantu vandaka kumona.)

- Vinu ya ndudi vandaka kima ya mbote ya kunwa? (Ikele ve. Keti nge zola kunwa vinegre?)

6C Kusonga inki me salama:

- Ndambu ya bana sala bonso Yesu, ti ndambu ya nkaka, bo sala bonso basoda ya kele kupesa Yesu vinu ya ndudi sambu Yandi nwa.
- “Yesu” tula maboko na lweka bonso Yandi kele na zulu ya kulunsi, ebuna Yandi tuba nde, “Mono ke na nzala ya masa.”
- “Basoda” sala bonso bo ke kanga kinuka na nti.
- “Basoda” sala bonso bo ke tula kinuka yina na kati ya dibunga ya vinu ya ndudi.
- “Basoda” tula yo na munoko ya Yesu.

6D Kuyimba ti kukina inki me salama:

Bo pesaka Yesu vinu ya ndudi. “Eew! Yuk!”
Sambu konso mbikudulu ya Ndinga ya Nzambi,
Yonso fweti kulunga. Yonso, Yo-o-nso!

7. Yesu tubaka nde, “Imene!”, “Tata, Mono vutula mpeve na Mono na maboko na Nge,” ebuna Yandi kudipesaka moyo na Yandi.

7A Tanga:

<p><i>Matayo Ch 27 vs 50</i> 50 Kansi Yesu tulaka diaka ndinga ya ngolo, ebuna yandi fwa.</p>	<p><i>Luka Ch 23 Vs 46</i> 46 Yesu tubaka na ndinga ya ngolo nde: “Tata, mono ke pesa moyo na mono na maboko na nge.” Ntangu yandi tubaka mambu yina imene, yandi fwa.</p>	<p><i>Yoane Ch 19 Vs 30</i> 30 Ntangu Yesu me baka vinu yina imene, yandi tuba nde: “Imene.” Ebuna yandi kulumusa ntu na nsi, yandi fwa.</p>
---	---	---

7B Yula bana bonso yai--

Niveau Primaire:

- Yesu tubaka mambu yai na ndinga ya inki mutindu? (Na ndinga ya ngolo.)
- Sambu na inki nge banza Yandi sadilaka ndinga ya ngolo? (Sambu bantu yonso kuwa Yandi.)
- Na nima Yesu bakaka vinu ya ndudi, Yandi tubaka inki? (Yandi tubaka nde, “Imene.”)
- Inki vandaka bandinga ya nsuka ya Yesu? (“Tata, mono ke pesa moyo na mono na maboko na nge.”)

Niveau Secondaire:

- Ntangu Yesu tubaka “Imene,” beto bakisa nswalu nde moyo na Yandi awa na nsi-ntoto vandaka na nsuka. Kansi keti yo zolaka kutuba kuluta yo? Inki yo zolaka kutuba? (Ee, Yo zolaka kutuba nde lukanu ya Nzambi sambu na mpulusu me lunga. Yesu me manisa yonso sambu na kugulusa beto. Nsilulu ya Nzambi silaka ntamaaa, nde Yandi ta tinda Mesia-Mvulusi sambu na kumanisa ngolo ya Satana, Nzambi me lungisa yo. Nkailu kukonda kifu, nkailu ya menga ya Nzambi ndimaka mpenza sambu na mpulusu na beto, yo me salama.)
- Keti bantu fwaka Yesu to Yandi kudipesaka moyo na Yandi? (Bo monaka bonso bo mosi fwaka Yandi, kansi mambu ya kieleka ya salamaka kele nde Yandi kudipesaka moyo na Yandi.)
- Beto me manisa kulonguka bandinga yonso ya Yesu tubaka ntangu Yandi vandaka na zulu ya kulunsi. Inki kele mabanza ya beno sambu na bandinga yina? (Longi, pesa ntangu nde bana lenda pesa mabanza na bo.)

7C Kusonga inki me salama:

Bana yonso sala bonso bo kele Yesu. Na ndinga ya ngolo bo boka, “Imene!” Na nima, bo tuba nde, “Tata, mono ke pesa moyo na mono na maboko na nge.” Bo kulumusa ntu. Bo vanda pima.

7D Kuyimba ti kukina inki me salama:

Tula ton ti ritime sambu na ndinga “Imene”, ti sala repetitio na yo. Na nima, nge tanga nzila mosi ti songa bana musapi. Bo yonso yimba, “Imene.” Nge tanga nzila ya zole ti bo yimba “Imene,” etc. ti bo nikisa maboko na zulu kusonga nde Yesu me nunga.

Longi:

Nzambi silaka Mesia ya ta manisa ngolo ya Satana.
 Nzambi silaka Yandi ta yidika nzila beto lenda kuguluka.
 Nzambi tubaka nde Mesia ta vanda dimeme ya Nzambi.
 Bansilulu yonso ya Bible, yo ta lunga.
 Mesia me kangula nzila beto vutuka na Nzambi.
 Imene! Imene! Imene!

Bana:

Imene!
 Imene!
 Imene!
 Imene!
 Imene!

Devoir sambu na bana ya me guluka dezia:

Ata ntangu Yesu vandaka kumona mpasi ya ngolo na zulu ya kulunsi, Yandi vandaka kuyindula mambote ya bantu ya nkaka. Yandi vandaka kuyindula beto, kuyindula nde beto fweti kuguluka. Mono pesa beno devoir nde mposo yai, nge meka kuyindula mambote ya bantu ya nkaka. Inki mutindu nge lenda sadisa bo? Nge lenda ve kugulusa bo, kansi nge lenda songa bo luzolo ya Nzambi. Lomba Nzambi nde Yandi songa nge bampila kusala yo mposo yai.

Kubinga bana ya zaba Yesu ntete ve:

Ntangu Yesu vandaka kufwa na zulu ya kulunsi, Yandi salaka yo sambu na nge. Yandi kufwaka sambu na kufuta mfuka ya masumu ya nge na Nzambi. Kansi, ata Yandi futaka sambu nge kuguluka, nge ta guluka kaka na ntangu ya nge ndima, nge baka, nge yamba yina ya Yandi salaka sambu na nge. Mbala ya nkaka nge me yamba Yandi dezia. Kana nge me sala yo na ntima ya kieleka, Yandi kele kubikala ti nge, bubuyai ti mvu ya mvu. Nge lenda tuba Aleluya ti mono?

Kansi, kana nge me yamba Yandi ntete ve, bubuyai kele ntangu ya mbote kuzenga makambo yina. Kana nge zola kuyamba Yandi bubuyai, na nima ya classe, kaka bikala ti kwisa vanda na bakiti yai. (Longi, songa bana wapi bo lenda kutana ti nge.) Mono ta kwisa ti songa nge inki mutindu nge lenda yamba Yesu sambu nge vanda na mpulusu, mpi.

===

NSUKA YA LESO

===

NB: Atasio, longi!

Ntangu yai, nge me manisa kusadila baleso yai. Baleso ya mpa ke kinga nge na Centre des Materiels, sika nge me defa baleso yai. Mabundu ya nkaka mpi ke kinga kudefa baleso yai sambu bo mona mpila kulonga bana na bo. Ntangu yai, vutula materiels yonso na sachet ti vutula yonso na Centre des Materiels ya MCE. Merci mingi sambu na collaboration ya nge !